

Vlada Republike Srpske konačno ispunjava svoje obaveze

Nakon što je pomno razmotrio izvještaj, koji je Uredu visokog predstavnika prezentiran u petak 30. septembra, visoki predstavnik je potvrdio da Vlada Republike Srpske konačno ispunjava zahtjeve visokog predstavnika navedene u njegovoj odluci. Vlada Republike Srpske je konačno ozbiljno shvatila svoje obaveze i omogućila pristup informacijama u njenom posjedu, a koje su u vezi sa zločinima koji su počinjeni u Srebrenici u periodu od 11. do 19. jula 1995. godine.

Nakon mnogobrojnih odlaganja OHR je prihvatio činjenicu da Izvještaj sa svim svojim aneksima, a koji su danas potpisali svi članovi Radne grupe, predstavlja ozbiljan pokušaj da se napravi opširan spisak svih lica koja su bila upletena u zločine u području Srebrenice u periodu od 11. do 19. jula 1995. godine. Radna grupa za Srebrenicu i Vlada Republike Srpske su konačno ispunili zahtjeve koji su im upućeni.

Nijedno ime navedeno u ovom izvještaju neće biti dato u javnost kako bi se osiguralo da se ne ugroze buduće istrage, krivična gonjenja i moguće osude. OHR očekuje da će Tužilaštvo BiH utvrditi prioritete svojih istraga kako bi se u početku fokusirali na osobe koje se još uvijek nalaze na funkcijama u institucijama Republike Srpske i Bosne i Hercegovine.

Aneksi uz Izvještaj ne procjenjuju nivo odgovornosti niti predstavljaju dokaz da je neka osoba kriva za zločin. Izvještaj i dokumenti se prosljeđuju Tužilaštvu Bosne i Hercegovine koji treba procesuirati navedene informacije i odlučiti kako da nastavi sa bilo kakvim istragama. Ured visokog predstavnika vjeruje da će svaka istraga biti urađena

temeljito i nepristrasno.

Prezentirana informacija je utemeljena samo na trenutno dostupnim materijalima. Nema sumnje da novi dokazi čekaju da budu otkriveni. Iako je spisak opsežan, u ovom trenutku se ne može se isključiti mogućnost da se pojave nova imena koja su u vezi sa ovim zločinima. Ako se ovo dogodi od Vlade Republike Srpske će se zatražiti da tu informaciju dostavi Tužilaštvu Bosne i Hercegovine.

Ured visokog predstavnika iskreno vjeruje da nijedna istraga ne može biti zamjena za tragični gubitak najdražih osoba, ali nakon što je probijen zid šutnje, koji je ove događaje okruživao skoro deceniju, oni koji su izgubili svoje najmilije imaju mogućnost da dobiju odgovore koje su tražili sve od jula 1995. godine te da pravda bude ispunjena. To se može ostvariti samo primjenom vladavine prava i potpunim pravosudnim procesom u odgovarajućim međunarodnim i domaćim institucijama.